

Kitaani sinerissatsinni qassutikut qallorneqarnissaannut suliniutissatut pilersaarummik UKA2019-mut Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Aqqaluaq B. Egede, Inuit Ataqtigiit)

Pillugu

Eqqissisimatitsinermut Avatangiisinullu ataatsimiititaliap

Siunnersuutip aappassanneerpeqarnerani

ISUMALIUTISSIISSUTAA

Suliarinninnermi ataatsimiititaliap ukuninnga inuttaqarpoq:

Inatsisartunut ilaasortaq Doris J. Jensen, Siumut, siulittaasoq
Inatsisartunut ilaasortaq Aqqa Samuelson, Inuit Ataqtigiit, Siulittaasup tullia
Inatsisartunut ilaasortaq Nikkulaat Jeremiassen, Siumut
Inatsisartunut ilaasortaq Mikivsuk Thomassen, Inuit Ataqtigiit
Inatsisartunut ilaasortaq Steen Lyng, Demokraatit

Siunnersuut UPA2019-mi ulloq 30. April siullermeerlugu oqallisigineqarnerata kingorna ataatsimiititaliamit suliarineqarpoq:

Siunnersuutip imarisaa siunertaalu

Siunnersuummi siunertarineqarpoq kitaani qassutikut piarneqarnissaanut suliniutissatut pilersaarummik Naalakkersuisut saqqummiussissatut. Aalisarnej pingaarnertut nunatta aningaasatigit isaatitsissutigimmagu taamaattumillu siunissami imminut akilersinnaasumik aalisagaqarfeqarnissaq pingaaruteqarmat naalakkersuinikkut imartatta saligaatsuutinissaata isummerfigineqarnissaa siunnersuummi tunngavigineqarpoq.

Siunnersuutip inatsisartunit siullermeerneqarnera.

Siunnersuut tunngaviatigit paartiit tamarmik taperserpaat.

Demokraatit allannguutissatut siunnersuuteqarput, imalu allassimavoq:

"Kalaallit Nunaanni pinngortitamut piniutikunik maanngaannaq qimatsisarnerup pinaveersaartinnissaanut kiisalu piniutikunik katersinissamut suliniutissatut pilersaarummik UKA2019-mut Naalakkersuisut peqquneqarnissaannik Inatsisartut aalajangiiffigisassaattut siunnersuut."

Paartiinilli amerlanerussuteqartunit Naalakkersuisunit allannguutissatut siunnersuut ima allassimasoq taperserreqarpoq:

Kalaallit Nunaanni sineriak tamakkerlugu imartatsinni qassutit allallu aalisarnermut atortut salinneqarnissaannut suliniutissatut pilersaarummik Naalakkersuisut UPA2020-imut saqqummiusseqqullugit peqquneqarnissaannik Inatsisartut aalajangiiffigisassaattut siunnersuut.

Siunnersuutip ataatsimiititaliamit suliarineqarnera

Naalakkersuisunit aamma Demokraatinit allannguutissatut siunnersuutit ataatsimiititaliamit misissorneqarput ataatsimiititaliallu kissaataasa ilanngunneqarnissaat kiisalu siunnersuuteqartut siunnersuumminni siunertarisai tunngavigalugit ima allannguutissatut siunnersuuteqarluni:

"Kalaallit Nunaanni sineriak tamakkerlugu imartatsinni qassutaarsiutit, bundgarnit, kiisalu piniutikut allat salinneqarnissaannut suliniutissatut pilersaarummik Naalakkersuisut UPA2020-mut saqqummiusseqqullugit peqquneqarnissaannik Inatsisartut aalajangiiffigisassaattut siunnersuut".

Piffissamik pisariaqartinneqartumik piffissaaliisoqarnissaa ataatsimiititaliamit kissaatigineqarpoq, taamaaliornikkut nuna tamakkerlugu piniarnermut atortut pillugit suliniutissatut pilersaarummik Naalakkersuisut suliaqarsinnaaqullugit. Tamatuma saniatigut nunatsinni piffinni piniariartarfiit tamarmik, kitaata sineriaani aamma tunup sineriaani, suliniutissatut pilersaarummi ilanngunneqarnissaat ataatsimiititaliamit kissaatigineqarpoq.

Atusut pinngortitamik uumasunillu atuinermi peqqissaartumik atuinissat ataatsimiititaliamit ilanngullugu kissaatigineqarpoq, taamaaliornikkut siunissamut imminut napatissinnaasumik ineriartortoqarniassammat.

Suliniutissatut pilersaarut aqqutigalugu piffinni ataasiakkaani kina/kikkut saliinissamut akisussaanersut takuneqarsinnaanngornissaat naggataatigut ataatsimiititaliamit neriuutigineqarpoq.

Siunnersuutip aningaasatigut kingunerisassai.

Inatsisartut suleriaasianni § 33. Imm. 1-mi allassimavoq aalajangiiffigisassatut siunnersuutip piviusunngortinneqarnerani aningaasatigut kinguneritinneqartussat siunnersuutip tungavilersuutaanut ilanngullugit allassimassasut.


Siunnersuutip piviusunngortinneqarnerani aningaasatigut kinguneritinneqartussat siunnersuummi tamatumunnga naapertuuttumik allassimasut ataatsimiititaliamit maluginiarneqarpoq, tassa, suliniutissamik pilersaarummik suliaqarnermi AC-fuldmægtig-tut akissarsiaritinneqartut ukiumut 500.000 kr. Ataatsissanngikkaat.

Avataaniit suleqateqarluni aqqissuussinermi suliat kiisalu Namminersorlutik Oqartussani aqqissuussinermik suliaqarnerit aningaasaliissutinut ilanngunneqareerput. Suliniutissatut pilersaaruttip agguanneqarneranut aningaasartuutaasussat aningaasaliinermi ilanngullugit aningaasartaliiffigineqareerput. Suliniutissatut pilersaarut naapertorlugu suliarineqartussat, suliniutaasussallu allarluinnarmik aningaasartuutissanik nukissanillu atuinerusussaasutut naatsorsuutigineqarpoq. Naatsorsuutigineqarporlu suliniutissatut pilersaruttip piareernerani tamakku paasineqarnissaat.


Ataatsimiititaliap inassuteqaataa

Ataatsimiititaliap **isumaqatigiittup** namminneq allannguutissatut siunnersuutertik isumaliutissiisummi matumani saqqummiunneqartoq akuerinesassanngortippaa, peqatigisaanillu siunnersuutaaqqaartoq taamatullu Naalakkersuisunit aamma Demokratinit allannguutissatut siunnersuutit itigartinneqartussanngortillugit.

Taama oqaaseqarluni isumaliutissiisummilu allassimasutut paasinnilluni matumuuna ataatsimiititaliap siunnersuut aappassaanniigassanngortippaa.




Doris J. Jensen
Siulittaasoq




Aqqa Samuelsen
Siulittaasup tullia



Nikkulaat Jeremiassen



Mikivsuk Thomassen



Steen Lynge